

四庫全書

集部

欽定四庫全書

兩宋名賢小集卷二百五十三

宋 陳思 編

元 陳世隆 補

竹齋詩集 二

裘萬頃

送詩僧如師西遊

向來詩壇上權奇聲籍籍君雖後兩翁而已分半席主

人龍門高宜有如此客橫行翰墨場往往一當百挾是
今西遊吐談取雙壁要須早歸來成就法王宅

從人覓墨梅

熏爐束詩魂茗椀驅睡思掩闕寂無營翰墨自娛戲山
寒溪正清月淡雪初霽橫斜兩三枝見說可人意天機
如胸中出手特餘事何時剪冰紉來對病居士

睡起

疾去得安卧寒宵不知長鄰鷄忽聞聲曙色侵我牀人生孰

無營晨興固其常奈何以一身投之百憂場吾方休吾心與
世長相忘適逢希夷翁授我枕中方意行到華胥日昃猶徬
徉回觀一世擾擾良可傷誰能從我遊要須留春皇

讀邸報

紛紛天下事翻覆良難期不知杳冥中主張者云誰工
拙判兩途人謀豈容施得非欲平治機緘遂潛移目前
三四公並用無一遺毋嫌滯一州民實邦之基向來番
江頭親見國子師德行淵與騫千載如同時斯人使臨

民兒不賴母慈人言致泰和須索登皋夔位崇澤斯均
否則失所宜天乎倘人從何時可臻茲

次伯量贈別詩韻

我生既駕下且復寡見聞時時警其愚姻黨賴有君自
慚忝且疲不足張此軍君乃不我棄歡然與同羣願學
如之何此志良已勤坐未知方所得失不足云人生所
好異其力用是分詞章末技耳安能婉皇墳而況字書
學兀兀纂說文曷若鞭吾心或有汗馬勲請益恨未能

別君大江濱長吟昌黎詩安得身登雲

老農歎

霜畊冰在趾雨種泥沒膝旱魃忽為虐耕種漫勞力去年幸一稔今歲免艱食細聽老農語令我三歎息但願從此去龍骨長挂壁大田多黍稌高廩若山積或云穀大豐則恐錢鏹罄夏租星火急處此未有策細民一錢稅往往亦追索穀賤反傷農此語傳自昔語客但勿憂新絲尚堪質

十二月大雨

一冬都無五日寒赤日杲杲后土乾水官丐歸帝弗語
詰朝不雨吾戮汝斯須便放大瓢傾一洗萬里塵埃清
不妨更作夜深雪桑榆之功尚堪說

燈下偶次前韻

北風吹雨夜正寒北窻吟詩古欲乾千辛萬苦浪如許
飯顆山頭誰著汝何如一尊隨意傾酒酣不問濁與清
明朝縱有三尺雪灞陵詩句無容說

別敬叔

筆硯君無間，冰霜歲又除。
諸生得模範，六藝共畊鋤。
松菊淵明宅，蓬蒿仲蔚居。
相望倘相憶，時寄數行書。

贈畫工

綵筆三生夢，春蓮萬葉花。
笑人為市道，隨分足生涯。
山路淨如水，溪流淺見沙。
能來良不惡，看我傲煙霞。

次胡伯仁韻

山長飛鳥急，江濶去帆微。
唱晚幾漁笛，憑高一釣磯。
從

欽定四庫全書

兩宋名賢小集
卷二百五十三

君濯冰雪滿袖得珠璣三嘆不能已歸來吟夕暉

書晁文元道院集

華屋金猊座雕鞍駟馬車才堪誇世俗早已落丘墟此
病久沉痾無人解掃除千年子晁子道院有遺書

送范二丈入藍田書院二首

今代崔斯立才高不負丞君方為重客人謂得良朋敏
捷朝十字辛勤夜一燈明年冠秋試萬里看飛騰

君在淳熙日常師陸監丞今為後死者樂有遠來朋此

道未墜地他時要續燈病夫力不足拱立看騫騰

夜坐再用前韻二首

洪井今真隱長沙昔漫丞餘生得巖壑拙宦愧交朋飯
菜渾忘肉囊螢足代燈詩來夜將半雲際月騰騰

家有輞川集人如王右丞琴書多暇日觴詠盡高朋擬
脫雲山屐來分夜案燈新詩要傳寫病眼任慵騰

送胡仲立入京

昔對延英日諸公嘆勿如敢言天下事不負案頭書此

去朝雙闕懸知有異殊榮途方著脚未用曳長裾

次施真人韻

素鞵方多難丹砂倘一逢勿疑蕉覆鹿會見竹成龍澗
水遠仍潔巖花幽更濃行行望仙宇知在最高峰

暘谷偶成

竹近頗欣衣袂爽苔深常惜履痕侵夜燈四壁圖書影
曉日一牀花木陰載酒只今誰好事絕絃從昔為知音
區區外物成何用慎勿緣渠愁此心

入京道中風雨因賦此遂退休

新築書堂壁未乾
馬蹄催我上長安
兒時只道為官好
老去方知行路難
千里關山千里念
一番風雨一番寒
何如靜坐茅齋下
翠竹蒼梧子細看

閒居

閒居最與性相便
勤即緝書懶即眠
終日閉門真省事
有時面壁似耽禪
大椿歲籥祈親壽
斷簡生涯聽子傳
待問洪崖覓丹訣
白雲深處引寒泉

松花開竹笋茂喜而詠之

繁花密笋暮春時
粧點園林一段奇
金粉生香風細細
斑衣留潤露垂垂
品高宜入神仙藥
節勁終全冰雪姿
笑彼杏桃兒女態
漫爭艷冶媚山岐

睡起書懷時諸公相勉再出

北窻終日廢書眠
一枕清風值萬錢
雲度茅簷輕冉冉
泉生石砌淨涓涓
不嫌雨脚花間注
要聽秋聲屋外傳
三徑初成吾欲老
幕中何用泛紅蓮

有感時與李洪齋有約

去年今日西歸客
曝背茅簷又一冬
歲月催人雖迅速
簡編于我却從容
知名焉用詩千首
養病聊須酒一鍾
早晚杖藜修水去
故人有約許相從

用前韻謝伯量過訪山中

勝遊千里笑談中
雪片梅花正仲冬
肯向簾門尋孺子
更能草具重茅容
春風頓覺生寒谷
夜榻惟愁聽曉鐘
半世坡門下客乃
今何幸得過從

送胡仲衡

憶昔樵江一見君，喜君吃吃喜談文。
別來歲月今如許，書裏工夫想得勤。
近世起家多白屋，幾人馳志在青雲。
穡齋已踏賢關路，更有諸孫策異勲。

喜范光伯相過

章江東下幾灣回，誰伴臞仙夜探梅。
離別不禁詩社冷，遭逢莫放酒船回。
水霜滿眼歲將換，花柳轉頭春又來。
安得飛騰九宵外，鞭鷲笞鳳日相陪。

懷范光伯再用前韻

梅邊流水碧洄洄都把相思付折梅十載不禁雙淚落
一尊期慰九腸回驚殘蝶夢鵲空喜望斷馬蹄人不來
咫尺雲山尚如此天涯卿解得追陪

次光伯韻

竹筵當年手自開只今無處著莓苔絕憐此地過從少
賴有高人時復來籬下久霜猶有菊水邊近臘正多梅
我方春春三年別君莫忽忽一夕回

錢塘次孫教南韻

簿領歸來得泮宮一時袞袞任諸公市朝競逐利名走
草木誰為臭味同雪水不妨披宿霧蓬山正要挹清風
塵埃不得從君後豈但他時愧兩翁

次朱震遠韻

芳池綠水自生肥上有軒窗隱翠微花竹舊嘗開小徑
門闌今又啟重扉直須闔闔排雲去要看長安躍馬歸
詞賦合魁天下士春光端不負劉輝

善利閣次伯仁所題趙子良畫四首

瑩篴君鄉來分明寄江樹想君詩成時夢作白鷗去
平生交友間吾情蓋屢岸區區稻梁謀君亦逐鴻鴈
風簷手君詩心跡已清絕何當更長吟坐對澄江雪
扁舟兩漁翁清唱發日暮安得如鷗夷相與五湖去

自驚

俗塵易污人胸次須自潔君看四明老冰壺浸秋月

題蘇希亮壁

石梁渡山澗上有秦人居歲寒不種桃汲泉灌佳蔬

兀坐有感

息綿綿而不絕心了了以常明靜室我方燕坐旁人喚
作修行

次伯仁過道旁田家韻

桃源千載鎖烟雲若輩安知古有秦恐是吳興沈東老
一尊聊復醉詩人

即事二首

門前溪水欲平堤，漫著漁竿淺處垂。
晴雨每關憂國念，豐凶端欲問人知。

春時耕種夏時耘，七月農夫始食新。
此去田家常要雨，雨多元自不妨人。

秋

數聲收笛日將晚，一曲樵歌山更幽。
解帶盤桓小溪上，坐看紅葉汎清流。

久雨

園林清樾淨無塵池沼黃流去有聲不用飛花來點綴
但須霽日為澄清

上元憶大梵明燈二首

經年不到豫章城燈火遙聞鼓吹聲却憶秋屏臺上寺
絳紗青玉幾長明

突兀招提枕古城夜深鐘磬寂無聲坐馳燈火笙歌地
知有何人一點明

秋日即事

斷鴈聲邊小雨來菊花強半卧蒼苔乍寒天氣雖宜酒
冷淡無心把酒盃

九日

籬落黃花尚自無白衣猶未到吾廬莫令此日負佳節
為展淵明采菊圖

松齋秋咏次黃存之韻七首

少年有策志平戎心事今來一老翁蜀客款門茶未了
旁人又說棗兒紅

西風黃葉掃空庭
舞鶴翩翩墮雪翎
一陣清風通鼻觀
木犀庭下讀騷經

牽牛挂蔓上東籬
氣肅清商雨過時
人意若隨天意好
秋光又到菊花枝

閉門思古感傷今
每有詩來默契心
紙上不須論巧拙
堯夫只是靜中吟

閒中無事亦無榮
案上圖書有課程
靜對秋花香默默
晚風休送亂蟬鳴

據梧杖策事紛然樓上看山對晚眠縱是樓無山色遠
只如小米畫雲煙

無事縈心晝掩扉松風度曲入琴徽登高老矣興猶在
塞上秋風戰馬肥

次仲庸初冬即事二首

常歲霜天分外晴一溪如練浸冰輪今年風雨寧無夜
誰與溪梅作小春

君家秋實洞庭種小子持來獨未黃莫作蘇州書後夢

只今正欠滿林霜

雪中戲元德元齡二弟二首

在昔梅花猶有賦如今冰柱亦無詩
吾哀不作池塘夢
春草生時子合知

袖間出手不應遲
柳絮漁蓑總是詩
二妙得君真所喜
一寒如吾有誰知

再韻寄元齡弟二首

李也東歸何太遲
伯兮西望屢吟詩
茅簷夜卧雪深尺

人在蓬窻知不知

小舟閒繫在江湄
滿眼瓊瑤定有詩
詩似其人人似雪
只應清處恐人知

雪中再示德齡二弟三首

只道園林春未歸
風前一夜柳花飛
東皇自是繁華主
不用玄冥薦玉妃

平生蓑笠慣衝寒
長憶江湖把釣竿
昨夜北窻聞雪作
夢魂飛到子陵灘

青青窻外幾修篁也學宮梅巧樣粧說與惠連須著句
雪邊春色到池塘

再用韻三首

亂飄窻戶重重積巧入簾櫳細細飛想見釣天張樂處
瓊蕤澌灩到千妃

蕙帳一冬每苦寒夢回長是日三竿那知今夜剡溪路
月淡扁舟水滿灘

鳳臺仙姊掩銀篁歸去瑤池試晚粧剝粉殘脂無處著

化為風絮滿池塘

再用韻三首

無人低唱兩三阕
一任瓊瑤滿眼飛
羅襪暗塵應洗盡
月明吾欲看江妃

憶昔騎驢犯曉寒
酒旗隨處認長竿
灞陵物物皆詩句
不用牽船八節灘

眼前脩潔獨脩篁
屢倩東風洗曉粧
學舞腰肢困珠玉
可憐官柳在寒塘

再用韻三首

梨花月淡珠簾捲
柳絮風輕粉蝶飛
官漏無聲窻欲曙
霓裳催舞廣寒妃

雪裏鷗盟元未寒
小舟南浦著漁竿
眼明似共月千里
衣冷欲迷雲一灘

疎梅元自映疎篁
誰把瓊瑤特地粧
雪後園林應更好
却輸和靖在錢塘

次元德弟韻

跋扈飛揚使我驚
鐵中雙鏃自錚錚
陳橋舊將今無用
一任於菟繞屋行

余從元德弟借到西廊書齋朝夕其間今二年矣
戲作病僧寮且賦三絕

雖有圖書伴寂寥
不妨題作病僧寮
蒲團竹椅南窗下
一炷爐香百念消

華髮蒼顏一病僧
向來文史頗關情
只緣世網無由脫
遂學枯禪度此生

朝來寮外望西山正在雲煙縹緲間
既欲與山為保社不妨身世似雲閒

再咏三首

病僧行脚歸來後萬事無心每閉寮
日射竹窗風葉亂烟凝香鼎篆紋消

厭趨朝市元無夢慣處山林似有情
圓覺楞嚴俱不解維摩會下一書生

無心對客煨黃獸有意看雲傍白鷗
終日區區弄文墨

笑他齊已與高閒

寄元齡弟五首

餘生瑞合老吾廬心地全然與世疎
安得數椽西嶺下
自行溪水灌園蔬

莫怪窮年不入州
載書前已會盟鷗
市朝畢竟多塵事
且傍溪山靜處留

俯仰人間又一年
即今科詔下天邊
功名萬一來相逼
試向榮途小著鞭

少年妄作功名想
說著長安喜欲狂
多病年來怕奔走
却思雲壑置藤牀

一室蕭然百事無
崇朝趺坐對熏爐
岫雲舒卷元無礙
贏得從容養病軀

兩宋名賢小集卷二百五十三

欽定四庫全書

兩宋名賢小集卷二百五十四

宋 陳思 編

元 陳世隆 補

竹齋詩集 三

裴萬頃

送范光伯北行

玄冥將歸休勾芒已促裝江邊疏柳青江上寒梅香有

客當此時中流駕風檣欲學太史公窮汶泗沅湘吾聞
帝王州雄麗幾錢塘疇昔駐大龍至今繪未央鷺洲橫
渺瀰鳳臺摩青蒼名山與大川往往遙相望是間或小
留不妨日徜徉平生學屠龍袖手五字章茲逢賢主人
定知秦宮商追李逐杜陵相與升其堂安令千萬篇金
薤垂琳琅秋風鴻雁來因之東南翔寫君磊落胸懌我
離別腸

安樂窩示元德弟二首

往時病僧寮今為安樂窩昔病而今安所得良已多百
年直須臾一丘且婆婆倦翼栖茂林潛鱗渺重波方欣
隨所願豈復知其他朝來啟南窻羣山鬱嵯峨上有無
心雲乘風遠相過却觀聲利場紛紛正橫戈到頭蠻與
觸勝負能幾何曷若休我心考槃依澗阿孟夏草木繁
雨餘氣清和四壁環斷碑經史宿星羅幅巾坐胡牀條
然自吟哦因之成此詩要使兒童歌

清泉出石竇白雲卧山窩淋淫乍開霽原野歡聲多君

廬近西峰其下林婆婆解衣坐磐石持竿釣清波主人
忘機心鷗鳥亦無他東魯與南郭泰山等峨峨周人何
人哉自許不啻過一朝離草堂山英遂橫戈折轅不得
還如此俗駕何仰視前脩翁鉛刀比太阿余弟山林人
心平氣自和歡然樂簞瓢笑彼輩羶羅好書不厭觀佳
句時一哦煩賡紫芝曲為我醉時歌

題余仲祥松齋

芳妍桃李塲紛趨歛成蹊長松坐偃蹇遂爾不見知平

生異時人不與俗轉移蕭然塵埃中擅此丘壑奇牕空
境適清四壁風來吹抱琴揖蒼髯喜氣掀兩眉臭味既
與同相親不相違真期閱歲寒可但忘調饑斯正如乃
翁佳處更過之直比千尺幹歷落不受羈只恐大厦成
梁棟各有施出處初何心山靈勿疑渠

贈拂雲主人

十年作計須種木一日不可使無竹道人于此得三昧
綠霧中間著蒼玉拂雲誰為名其居我亦同心雲卷舒

相期直覓飛霞佩不用重拈種樹書

次余主簿仲庸梅韻

春醪欲冰木欲折急雨風吹不成雪玉妃夜墮廣寒宮
開作寒花竇清絕未須千樹種山巔且要幾枝橫水邊
暗香疎影尚無恙憑誰喚作西湖仙不妨琢句更馳送
一洗十年塵土夢鐵心元不為渠回眼底珠璣聊簸弄

偶成

松徑煩風掃柴門為雨扃行携道人集坐對敬齋銘好

事心常記閒談耳不聽觀空為時誤無異醉初醒

老屋

老屋久欹側隨宜聊拄撐吾今且共住緣盡會須行雨打從教壞風搖不用驚世間虛幻相聚散本無情

留淺沙

故山豈不好蕭寺亦堪居作意多成礙無心始自如鐘魚飽香積枕簟熟華胥但惜詩成後旁無阿買書

寄題喻高士澹軒

世事耶鄆枕生涯老子書能知澹中味雅稱竹間居石
徑排雲入霜根帶月鋤紛華不到眼贏得玩清虛

晚步

日落欲閉戶風清聊杖藜千山猶帶雨一徑已無泥
瀧水聲急急悠悠雲影低催歸緣底事著意傍人啼

榮姪試周

汝生方滿歲伯髮已星星桑苧甘投老蘭蓀喜向榮
席間無一印惟下有諸經莫學魚兒戲來年快聚螢

次王成之韻

誰遣冰魂照夕陽
搖搖一任北風涼
眼前共有幾多蕊
鼻觀胡為如此香
佳實會須歸列鼎
孤標已自壓羣芳
鴻毫我欲從君賦
未害平生鐵石腸

兀坐有感

忘言編簡倦三復
適意絲桐聊再行
已共白雲論久要
更尋青鳥問長生
按行泉石苔侵履
披拂松篁露濕纓
此事洪崖我知舊
歸歟端合與同盟

有感

正涵雙泉憶舊遊排江闌又有歸舟誰能不作十年調
夢斷真成萬事休傾蓋向東情莫逆生芻無計淚空流
重雲已失鷗鵬影愁絕滄浪一白鷗

送張高安入京

青衫十載瞻宮容黑綬三年鳳嶺頭循吏聲名陽武令
故家風味富平侯江邊休嘆雙鳬去天上行看一網收
入筴鵷班立仙仗莫忘回首顧沙鷗

用黃子益韻二首

青衫日日困塵沙
安用浮名與世誇
已過半生真是夢
未荒三徑且還家
恨無沉水紆香穗
喜有寒泉瀹茗花
袖却西歸遮日手
園林幽處看桑麻

睡起忙然思慮少
病餘猶覺應酬艱
招搖風月聊須竹
收拾雲烟幸有山
但要世緣隨手斷
莫憂詩債幾時還
追奔富貴非吾事
且占林泉一味閒

寄劉擇之新居成

西風吹雁過我廬特地傳君一紙書九載不須論舊事
萬金良喜得新居春回院落花侵座雨過池塘水遶除
我欲退之門下去却愁無處覓金魚

題懷秀堂

莫教滿地長莓苔杖履從今日日來曲逕隨要松巷轉
柴門須對石橋開牆頭花木因時種案上圖書任意堆
幸有林泉可投老忍將雙腳踏塵埃

竹齋述事

夢魂驚斷眇難續卧聽竹裏風冷冷寒蛩爭鳴遶四壁
缺月半墮橫疎櫺平生細字髮欲白午夜短檠燈尚青
稻粱作計吾不顧願學滄海鴻飛冥

大雪次前韻五首

雨師風伯妙天機幻出乾坤一段奇曉對青山渾似畫
夜看黃卷可忘飢金貂換酒非吾事鐵甲屯邊正此時
漠北殘魂應凍死書生猶賦采薇詩

天孫雲裏散支機飛墜人間分外奇勾引芳樽留客醉

栽培玉粒療民飢
幅巾離落尋梅處
一舸江湖釣月時
妙處惟詩可摹寫
却憐老去不工詩

誰扶天女下冰機
剪水成花片片奇
影落池塘波不動
寒侵鷗鷺色皆飢
縱橫萬舞風回處
表裏雙清月霽時
浪戰未能無寸鐵
對人羞誦醉翁詩

伊人元不墮危機
踏凍衝寒正自奇
只怪飛花無處避
都忘炊玉有時飢
月明剡水回舟夜
歲暮梁園作賦時
一段風流誰得似
只今王謝却能詩

誰知天巧出元機，但怪飛璫過眼奇。
暝立風枝寒雀倦，愁吟水谷曉猿飢。
蘆花洲渚月明夜，柳絮池塘春暮時。
此景人間不長有，寫真傳影正須詩。

題小桃源

半月池邊倚瘦藤，望仙臺上岸烏巾。
塵埃一點不到地，花木四時長是春。
載酒豈無好事者，爛柯應有著棋人。
請君更種桃千樹，準擬漁郎來問津。

次伯仁善利閣

看經堂中鐘磬鳴看經堂外水雲清山連遠渚鳥飛急
風入輕帆舟去平烟樹不妨留夕照塵纓正欲濯寒泓
憑誰為我問造物乞與少陵常眼明

挽霞溪高縣丞二首

少年挾策上金鑾三拜郎官鬢未班不說知音在霄漢
但知投老向雲山柳絲陰裏陶潛樂花錦香中潘岳閒
逝者不堪人事異洪崖亭下水潺潺

公家元在洪崖宅自是洪崖向上人嗜酒一生真簡淡

風標八表更精神紛紛偶厭人間事去去歸尋洞裏春
朱紱只今無覓處但餘佳句鎮長新

九齡弟寄悲秋四詩因次

不到青雲志未休近來何事却悲秋短檠雙目元無恙
快讀詩書莫浪愁

圖書繞屋未為貧想見長吟日閉門西社諸公久寥落
不知招得幾人魂

幸看平生古戰場不妨高卧到羲皇一朝冀北空凡馬

須信驂騑道路長

支離病骨怯初寒
眼底清愁更萬端
勉和新詩寄鴻雁
江城夜月覓君看

余既得烏石岡西望葛壇在雲霄中相去雖遠山
勢不斷林木歷歷可數異時乞靈仙翁不難矣喜
而成詩寄葛壇主人

東西知隔幾牛鳴
山勢綿綿若引繩
待向岡邊結茆屋
幅巾遙禮夜壇燈

寄張仲符時得烏石岡地二首

今人那似古人賢一鉤隨身日醉眠此老有靈應笑我
區區常費買山錢

寸田尺地可長久此訣劉郎却未傳他日馭風蓬島去
漫留陳跡在山巔

次敬叔韻二首

玉鑑冰壺一段清鐵中誰與鬪錚錚眼看萬里雲霄路
不信驂駟地上行

別我新詩有許清
玉聲金韻兩琮琤
筆端定有翻三峽
乞與餘波賦贈行

次李司直韻二首

老來方欲卧林泉
一躡紅塵只自憐
已與山靈有成說
秋風歸騎急加鞭

清虛絕跡竟何為
自笑平生頗好之
正路倘非君得似
冥行未免用多歧

別胡仲立次敬子伯量二文韻二首

修水相望無百里從來人物勝西昌弘齋自是朝陽鳳
伯仲行看接翼翔

乾枯如我真何用漫結蒲團竹椅緣緘口向人無一語
此燈他日遣誰傳

次余求之坐間所賦

地僻不聞車馬鬧官閒但覺屋廬深擺除詩債寂無事
一炷爐香觀此心

酌余求之二首

枕中久已黃梁熟鏡裏徒教白髮垂但得漁樵分半席
此生何必要人知

雨後輕窻無一塵窻前松竹更清新不妨踏遍莓苔地
遺我青鞋有故人

錢仲庸主簿入京三首

風帆轉眼即長安好在交遊半達官既有王陽知貢禹
不妨乘興一彈冠

孤山梅蕊正開時杖屨還須訪水湄莫遣冰魂嘆牢落

只令和靖自吟詩

野梅官柳只供愁
空倚鄱江百尺樓
待倩天邊幾鴻雁
為傳消息到皇州

別曹教授三首

一歲與君三別離
盍簪此去定何時
梅花未必堪相寄
待倩郵筒寄小詩

從渠柳色自青青
莫為行人賦渭城
只恐南牆舊時竹
誤隨風雨作離聲

江花岸柳太多情長逐春風管送迎我亦思歸歸未得
夜窻愁聽杜鵑聲

次吳長文見寄時有衡山之役

夜半詩成欲寄君夢魂飛渡楚江津怡怡前日如兄弟
今作東西南北人

次吳司理見貽二絕韻

未全得喪日悲懽內樂知誰夢見顏君看上池無限水
不將涓滴到人間

湛然胸次幸清明忍看人間勢利輕我輩相知端有道
未應膠漆付雷陳

寄題真愛堂三首

終南佳處暫栖遲堪笑唐朝左拾遺渠但借山為捷徑
山中滋味豈曾知

真實愛山今有誰此心猿鶴亦難欺看來却是朱居士
不愧昌黎五字詩

築堂誰不要看山往往襟期了不關欲識此翁高絕處

一心長在白雲間

安樂窩三首

天闕飛來三大字
雲山留住一間身
老仙駕鶴蓬萊去
丹竈而今屬後人

孤山嘗試一登臨
歸夢紛然繞故林
箇是平生安樂處
清泉白石總關心

生來歲晚寄南窗
燕坐常聞御墨香
却笑到天亭上客
日將茗粥攪枯腸

有感二首

絕憐修竹知人意更愛雙泉不世情
回首舊遊渾似夢却因多難悟無生

三四知音總道山荷鉏吾獨在田間
人言病驥猶堪秣伏櫪何心十二閑

高安別蘇野塘三首

獨立每憐陶靖節北窗終日傲羲皇
如今我亦無儕輩遠把心期付野塘

胸中泉石真成癖紙上雲烟總是詩分我魚舟三四箇
故山歸去弄漣漪

交蓋纔傾便話離絕憐立馬送君時梅花未必堪相寄
待倩郵筒寄小詩

題布亮畫

晚牧歸來月在山夜深茆舍不勝寒
栖鳥欲動催翁起快傍烟汀把釣竿

題昭君圖

紛紛爭賂毛延壽今日丹青竟不傳
萬事無過真實處
後人贏得寫嬋娟

題老梧畫卷四首

中興以前作山水只說李成與郭熙
誰知淳熙有此老
健筆不減巨然師

吏隱三年楚水頭
每隨鳬雁棹扁舟
歸來喜色驚鄰里
分得瀟湘一片秋

何處移來一川竹
空濛烟霧襲人衣
其間應有葛陂杖

時出林梢帶雨飛

謾謾風前荷葉枯
搖搖霜後蓼花疎
春鋤舊有江湖約
數輩相依正要渠

窻前古槐二首

密葉繚陰畫不成
捲簾雙眼為渠明
人間炎熱無來處
贏得軒窻分外清

去歲西湖避暑來
藕花無數眼慵開
而今歸卧洪崖側
看盡飛泉看古槐

題針得羹字韻

一寸堅剛鐵琢成
綺羅叢裏度平生
看時稚子敲成釣
釣得魚兒便作羹

題箋

六七葉廬秋雨裏
兩三箇雁夕陽邊
青天萬里渾無礙
衝破寒潭一抹烟

簡瑄上人

千里歸來覓故林
朱絃雖在少知音
春風玉几山前路

忍負平生一片心

簡瑄上人借楞嚴經


石室雲山鎖日扃
午雞啼處睡初醒
案頭尚有爐熏在
試讀楞嚴一卷經

題瑄上人隱室

閩浙相望兩道場
上人曾竈室中香
直須了却舊公案
莫向空山便隱藏

題破塵讀經所

試為衆生破一塵出經為筏度滄溟持渠到岸無驚畏
復破微塵納此經



兩宋名賢小集卷二百五十四

欽定四庫全書

集部

兩宋名賢小集卷二百五十五至

詳校官中書臣孫溶

助教臣常循覆勘

總校官編修臣王燕緒

校對官學正臣周鉉

謄錄監生臣趙金簡

欽定四庫全書

兩宋名賢小集卷二百五十五

宋 陳思 編

元 陳世隆 補

清獻集

杜範字成之黃巖人幼孤能撝志勵行從從祖南湖
方山二先生學以承考亭朱夫子之傳嘉定中舉進
士調金壇尉再為婺州司法入為御史彈劾無所避

與丞相鄭清之忤，範復奏鄭之私人李鳴復等賄賂交結，改起居郎，範以前奏未見施行，不拜。命徑渡江，歸授江東提點刑獄，尋改浙西。嘉熙二年，改知寧國。歲飢，捐俸發倉多所賑給。四年，還朝，極言時事之失，以吏部侍郎兼侍講，尋同知樞密院事。時鳴復亦在政府，不屑與共事，去之。淳祐四年，詔即家拜石丞相，挺身當國。年八旬，竟薨于位，贈少傅，謚清獻。事蹟具載國史。所著有古律詩歌詞五卷，雜文六卷，奏藁十

卷外制三卷進故事五卷經筵講義三卷

夏夜雲月不見有感

天色未清霽浮雲翳層空朦朧玉盤質髣髴擘絮中瓊宇
本瑩徹一髮不可容胡為受掩蓋萬象歸冥蒙誰能召
風伯掃氛有餘功中天懸清光娟娟萬里同

病中和東里寺中作

陋質百不能補敗倚師友東里夫人行幸添巾履後君
詩如秋霽峭絕森碧岫又如萬古壑潺湲瀉寒溜一手

轉機軸四顧無匹偶明窻一披讀張膽不論斗顧分有
餘光屢辱自醉酒徂暑變新涼一氣分六九逼仄塵區
間蒸鬱未改舊心逐林泉佳病滋面目醜起來強刀貧
寧敢繼富有

募兵

召募古來有今日何其艱文書急如雨取辦都保間百
夫不當十一夫費千鏹恐彼嗜利徒無能禦國患老母
與少婦蓬頭走江干挽之不得留悲泣聲徹天母曰我

壯子婦曰我健夫衣裳破無補田園荒未鋤一朝棄我
去饑寒我何如我欲從汝行生死同一隅抑恐情軍氣
累汝重汝辜今業已分離把袂略須臾拭淚為汝言汝
亦無我虞戮力濟王功期為壯士模

戊辰冬和湯南萬韻

春初走京華秋杪歸舊廬簡編廢已久開卷澀已疎誰
能擊其蒙石田或可腹鴈山有佳士讀盡天下書足跡
半九州不憚道里迂陋邦何足臨而亦來我居相從一

樽酒未厭園中蔬笑談欣有合浩若縱壑魚人生惟所
適所適各有途胸中苟不迷到處皆通衢簞瓢有真樂
顏氏何其臞役役嗟我生未知終焉圖論交須論心所
論在不渝願君示一語令我三反隅君無金玉音誦一束
生芻

丁丑別金壇劉漫塘

黃綺避世翁萬乘輕商顏翻然為羽翼國本安泰山出
處義與比盛衰世相關懷古誦考槃令人欲長歎

崇山鬱嵯峨千章自交陰培塿植松柏斤日相尋物
小固不容名大亦難任智哉甯夫子其愚非本心

北風吹夏律草木塵沙昏枝葉曾未害根本難具論肉
食謀何有家食徒殷勤誰能起東山掃翳扶朝暾

川澤升為雨霈然周四郊有水行地中溉灌亦良勞勢
力固有限憂哉加分毫為義分內耳誰言薄雲高

詞章道之華于世非少補施之匪其宜文繡被泥土自
昔重立言一語萬鈞弩誰其厭來者是非實千古

女羅去長松籍籍紛委地朦朧辭詔相十步九顛躓弱
昧慙陋質先生未終棄再拜願有聞服膺敢失墜
人生玩歲月世事變朝暮三年在門牆一日泣歧路窻
前長新綠生意自呈露願君日強飯安排濟時具

方山和篇再和韻

殷勤里社間談笑文字會平生一樽酒無慮千百醉問
梅窮澗岡樂事此其最風霜盡木末冰雪對戶外誰其
念岑寂自得以顛沛歲寒二三友已不數蒼檜卓彼方

山翁自許出行輩古心味玄酒于世百不嗜少小誦佳篇搜句亦奇偉年來久不作吾黨幾喪氣珠璧忽墮前疇昔曾夢寐三咏結束語坐令百感至來者恐未然往者非所計汗青幾名節徒起千載喟

張上舍送望水偶成小詩

我家東南隅去海不踰咫招潮厭鮮美望水快珍脆竭來雙溪上河魚僅青鯉泥滓漬膚肉強食輒三噉此物從何來對之驚且喜雖然餒敗質尚餘江海味令人憶

故鄉沽酒為一醉

閒坐有感偶成古風簡劉會之高吉父康司理

虞夏幾百載繼以周禮樂洋洋雅頌音後世誰能作井
疆貧富均薄海詠康樂姬公同聖賢積累亦不薄宜其
垂萬代整整守規矱寧知不數傳板蕩已非昨丘賦魯
史書田疇鄭謗作滕君漫憂勤畢戰空唯諾盛古猶有
憾此豈易商榷矧今千載後而欲強復剝州縣工罟罟
黔黎惴溝壑世道日澆訛禁厲不可縛我嘗三太息浮

雲翳碧落為貧走塵埃豈解拯民瘼州家輕任使千鈞
委羸惡勞瘁敢自愛恐負此邦託仁政安在哉名是意
已錯治道去泰甚此論東州確人言寬一分所望恕且
約嗟哉斯人生日巧亦日削俗吏事朱墨暴吏事鞭朴
我把七篇書人笑謂迂學誰與輸此懷濁浪渺垠堦

良月遊水樂

久矣聞水樂邂逅作此遊林立攢萬石曲逕穿深幽
豁開古洞下有清淺流惜哉非古音噴薄皆人謀流觴

飲山綠風鬢吹颼颼欲歸興未盡攜手湖上樓斜陽獻
萬狀浩以百目收白鳥去復還翩翩良自由我本山林
人對此多慙憂歲月不我與晏間其可偷便合作歸計
老矣安所投世事皆漫瀾政恐空白頭

送羅季能赴興國

向來與君別忽忽二十年君茲厲素節我已羞華顛轉
物有元機掃翳還青天羣耳共聳聰明詔方改元篤意
召諸老高爵升衆賢執麾不可挽問君胡為然一氣纔

作新萬卉皆爭妍雪霜誰謂無松柏良自堅操心不厭
危知機常慮先承流患疲民調俗暢新絃送日徒京塵
班春勝著鞭顧我足尚繁羨君駟方翩數里已云隔千
里其可前有懷空感惻何時解拘攣卓哉漫塘翁邈在
雲山邊煩君招衡門為我致問偏萬牛應莫回世事如
風薦

鴈蕩

東南富山水傑氣鍾鴈峯巨靈排扇巔妙力開鴻濛斷

崖據險絕峭壁凌寒空分形獻萬狀轉盼無一同或疊
如錦纈或鑄如青銅或前如舞鳳或却如飛鴻或伏如
卧虎或矯如遊龍並如兄語弟差如兒隨翁銳如筆露
穎歧如剪開鋒二湫分大小百靈儼西東古語聊近似
天巧難形容我久埋世埃幸此扳天風應接費耳目魄
磊羅心胸有僧本儒家伴我追雲蹤攀躋不知勞指引
殊未窮胡然使語別問之以涕從為渠遊興盡生我歸
意濃出計無艸艸回途復忽忽還此未了緣邂逅須有

逢

送夏肯父赴補

之子問行李策足遊上都
晚風吹客袂話別聊躊躇
朝家渴多士璧水來英儒
子志橫四海亦復隨羣趨
磨礪強國策他時獻嘉謨
卓彼漫塘翁一壺老壯圖
萬牛挽不前世事付長吁
君欲訪隱所為問今何如

雪中成十一韻

入冬多癘氣陽淺月令暢
隱雷聲間作萬蟄驚寒向數

日凝重陰雲同寒威壯飛瓊徧天宇色界鋪寶藏前此
亦屢白玉瑞此其創緘運孰主張一雪壓千瘴紛紛富
家兒羔酒醇金帳誰思道丐者雙脚不堪餉顧我雖甚
貧可挾尚有續早起願年豐共飽拜天貺天意然不然
獨立為楚愴

中秋夜客退觀月漫成

檻外不數丈深窻藏丘壑壁月懸中天玉露下叢薄尺
水澄秋光龜魚共余樂所樂亦伊何飲水良自覺恍若

歸故山灑然謝羈絡明發將何之塵埃又如昨行也誰
使之有此一大錯幸保寸心在舉頭望碧落

登山述懷

扶淚別妻子登山望歸舟舟遠望不及巖溜鳴咽嚶重
趺坐絕頂晚色忽已稠淒其杜宇聲問我胡為留撫襟
獨浩歎淚下不可收三年足別離此淚良有由區區駒
隙中為形役不休為形役尚可為人役何求淵明獨何
人我乃如拘囚親老方倚門甘旨誰供羞子幼未知學

擇師誰與謀
鬼域閃光怪
虎豹嗥昏幽
世路委叢棘
吾道若綴旒
豈無知我者
應謂我心愛

和劉會之野堂韻

艸艸春又過
淒晦風雨夕
三年烏傷夢
不斷一區宅
台山在何許
空有塵滿屐
英英江夏公
老龍蟠古澤
尋勝著幽宇
搜奇列佳石
疏懶不出門
亦復為渠役
酒酣對崔嵬
寸管凌千尺
念我蕭寺中
遠贈煩走力
隱几讀妙句
緬懷賓主席
何當謝吏網
足躡堂上客

詠芙蓉與菊花

秋光濃欲滴，結束東籬花。
糝糝紛點綴，戢戢相參差。
淵明太好事，言樂酌流霞。
誰云制顏齡，為與霜爭華。
映水開芙蓉，麗色如春葩。
漫以拒為名，青女不能加。
持此問淵明，何乃吞齒牙。
門外風如箭，黃落滿天涯。

送子謹叔

古道日凋敝，人心競險薄。
風雨晦朝暮，平陸變清壑。
歸來尋故廬，六窓靜猶昨。
殷勤時拂拭，埃塵易侵剝。
此地

寬且明休哉有餘樂

聚首日嬉戲何乃遽言別回首十年間坐令肝膽裂東
陽古佳地先民有遺烈為我一問之山寒水清絕無以
持贈君高秋千里月

送趙寬堂

兩片南山雲偶爾連空飛一去向空谷一留伴殘暉招
招漸江渡激激風吹衣卽頭有鴻鵠孰使心事違何時
黃山畔把酒話昨非

新秋

大火西流日秋風戶到時斷痕依淺水疊翠別高枝氣
每隨時改人應共物萎百年同一夢身後欲何為

和澧洲喜雨韻

秋色在何許浮嵐疊翠間江清雙鳥渡天濶片雲閒雅
量追文舉新詩塵子山更深聽遠溜哦詠答濺濺

次鄭府判金字韻

巖嶇來北固邂逅識南金未覺人間後欣同物外心燈

花殘夜半桂子落秋深細聽朱絃曲寥寥大雅音

和十九兄梅韻

空谷寒花好荒村野路長有懷尋往事無語攪枯腸老
氣猶無恙幽姿只自香喜君歌白雪茂對此新陽

道旁見梅

一樹棲殘雪不禁春夜霜香飄非寶篆粉褪壓時粧且
合收餘白應難待晚黃自便籬落好榛棘不相妨

途中

官身驚昨夢山店是回程郡事關新舊人心屬送迎塵
衫纔幸脫野服要須成世路如川險歸途却自平

有感

捧檄來茲邑勞勞兩載餘親庭千載隔家信十分疎有
婦聞多病諸兒盡廢書低簷秋雨滴點點正愁予

舟早行將至三界偶成

辭京塵漸遠入越思逾清雨壑溪方漲風帆去復輕天
光浮水濶山色帶雲橫更問鄉關路從今尚幾程

再次前韻

晨炊浮早渡午夜過錢清越國移舟便曹娥上堰輕人
言三界近共指一山橫古剎明朝到籃輿數去程
厭見塵泥汨喜看沙水清魚攢隈日暖鷗去帖波輕寒
渡人來少閒舟岸與橫漫須催去槳溪曲不論程

即事

官喜文書少塵迷歲月遷豈無車可出僅有約宜堅傍
水尋疎影裁詩讀細篇孤山須竟日莫去買遊船

水簾谷

巨崖森四立，鈇洞露前簷。
鳥道穿危磴，虬松奮老髯。
巖高全似砌，水小不成簾。
雖倦猶貪看，中宵澗雨添。

又和鄭府判韻

荆璞照耀非常珍，天衢整步凌通津。
與人軒闕破畦畛，滿懷拍拍無非春。
我如樗櫟異遠道，志在千里身未到。
竭來此地尋文盟，平生心事為傾倒。
飽德醉義樂有餘，况有蘭玉芬庭除。
諧笑云云殊未厭，盤餐夜半勞兵厨。

依依此情那忍去自恨塵鞍難久駐佇看飛詔自天來
殿前賸作摩空賦

再次沈節推送春韻

子規泣訴春山頭芳草連天不盡愁紫陌遊人在何處
空有顰眉人倚樓溪上悠悠棹木蘭溪邊落紅紛紛斑斑
嗟哉片片逐流水新篁忽長千琅玕多少閒愁推不去
欲問春歸杳無處少年知己負心期尊酒從今樂事稀

新秋

少昊行秋正疾驅灑然涼色已侵膚翠空碧水涵高下
淡靄蒼煙半有無風露已經生慘戚菰蒲且欲慰斯須
誰將霜竹橫雲外似有悲聲與恨俱

繼和嚴君壁上韻

山舍榱楹朽蠹餘竭來小圃作閒居推移寧免人間世
灑落還同心地初鷗鷺齊盟忘物我薜蘿交翠映簪裾
恭惟不負傳心印已把浮生付六如

己巳登王峰亭二首

與君攜手上巒坡多少塵襟盡刮磨一鳥橫邊秋靄淡
片雲歸處夕陽多潮來萬里翻明練山簇千峰列翠螺
此地不堪歸去早佇看明月漲金波

杖藜無事歷危坡一片清寒鏡面磨極目盡時知水濶
置身危處見秋多此時不著登山屐到處還成測海螺
遙想高人閒物外祇應不與世同波

次韻卅堂

心事崔嵬日不如愁端叢起蔓難圖殘山刺水風聲怒

落日微雲鴈影孤
妙句聳聞驚昨夢
寒窗細讀慰來蘇
許身已在義皇上
降志猶能念昔吾

又和鄭府判侯字韻

野人漫學事王侯
宦牒相從得俊遊
著眼丹青常午夜
轉頭萸菊已深秋
幾多陳迹成今古
莫對清樽話去留
自幸趨陪揮玉麈
如今何止識荊州

得雪稱賀馬上得五十六字

昨夜同雲猶未合
朝來一色變山河
料應天上梅花早

卷一百五十五
吹落人間柳絮多酒興自憐今老矣詩腸無奈此時何
銀杯逐馬天階路何事閒江伴釣蓑

次趙貴方九里松獨行韻

道機已熟絕隄閑縱步來尋興裏山殘雪點衣消酒醉
晚風吹鬢帶詩還妙年羨子歡踪足卑官愁余樂事慳
安得相從塵網外快將如意碎青珊

和六十叔一絕

夕陽有意為人留斜映寒江著小舟遠目遙岑無限意

不須蕭瑟賦悲秋

和趙山甫海棠

春風得意酌霞觴
翠袖寧禁白露霜
欲向月宮收勝馥
曉窻強理背時粧

次沈節推送春韻二首

佳人憔悴怯春衣
日暮樓高酒力微
流水落花無限恨
千聲杜宇況催歸

一年春事逐飛蓬
燕語千愁許未通
水竹誰家深院落

卷二
二
捲簾準擬納薰風

劉上舍携酒有詩和其韻

數過流年轉矚中
宦塵休更問窮通
君詩喚我塵埃夢
孤驛清燈一笑同

忽忽歲事又更新
一氣初回萬木春
獨有江梅殊不覺
凜然冰雪照詩人

偶題

雪外亂山才約畧
雨中平野更淒迷
有人支枕蓬窗底

卧看羣牛渡野溪

代菊對

未有淵明先有我何人喚我作淵明
東籬宛在南山下誰向秋風管落英

和高吉父

麥隴吹風餅餌香桑畦映日繭絲光
晚春好誦歸田賦問汝何為兩鬢霜

空明洞

在黃巖縣

莫訝青山小山因洞得名仙人騎鶴去留蹟在空明

送湯仲熊國正以直去國

朔風剪木末碩果懸孤危冥冥邈飛鴻異哉聞鳴鳩暮
雲結愁陰送君江之湄去者挽莫留留者良自悲何當
謝塵鞅鼓枻相追隨

兩宋名賢小集卷二百五十五

欽定四庫全書

兩宋名賢小集卷二百五十六

宋 陳思 編

元 陳世隆 補

西山先生詩集一

真德秀字希元浦城人慶元五年進士中詞科紹定
中拜參知政事進資政殿直學士提舉萬壽觀卒諡
文忠學者稱西山先生有集

登南嶽山

煙霞本成癖况復遊名山舉手招白雲欲納懷袖間吐
哉亦癡絕有著即名貪振衣遇長風浩浩天地寬

題金山

江來朱方注之東海潮怒飛日夕相撞春天將古來義
士骨化作狂瀾中央屹立之青峯孤根直下二十尺動
影裊窕冲融中黃金側布蘭若地鑿翠面面開窻櫺雙
橈伊軋破浪屋恍忽置我高龍庭是時千山雪新霽水

面月出天清空濤聲四起人籟寂毛髮蕭爽琉璃宮披
衣明發躡煙靄決背俯入歸飛鴻襟前渤澥斂暝色袖
裏岷峨吹曉風越南燕北但一氣塵埃野馬何時窮蒼
梧虞舜不可叫王事更恨歸忽忽

送湯伯紀歸安仁

交情世豈乏道合古所難自我得此友清芬襲芝蘭苦
語時見箴微言獲同參相從仁義林超出名利關此樂
未渠央忽告整征驂索居可奈何使我喟且嘆至危者

人心易汨惟善端苟無直諒友戒謹空杆盤重來勿愆
期同盟有青山聖經如果日羣目仰輝耀利欲滑其中
雲霧隔清照正須澄心源乃許窺道妙周程千載學敬
靜兩言要幾微察毫芒根本在奧竅持此當弦韋迂矣
君莫誚

送裴司直得請西歸

輕舸龍山頭木蘭作雙櫓飄然裴司直乘向南昌去問
君鶴鷺中脫身遽如許棲遲三十年始得官掌故小須

上上考宣不登省戶自言野心性眯目九衢霧修竹歲
云晚萱艸秋亦暮嗷嗷投林鳥猶得反其哺江西父母
邦非復昔饒裕蠻煙一腥穢樂歲且狼顧遺黎空杼軸
行旅窘刀布天門窈萬里可望不可籲君今佐元帥精
采繫一路瘡痍俟滌濯畫諾歸飲助先聲路人喜高節
懦夫慕邁當再前席一正天子度白鷗沒浩蕩蒼鶻在
指呼我亦南陵人扁舟從此具

題八君子圖後

劉子出西江訪我江之東何人與偕來銜袖八鉅公韓
歐開濟姿如晴月生空潞公山嶽重文正霜檜同玉立
者坡仙天游匪涪翁一朝參我前毛髮生清風淒其趙
韓王小異凌煙中半山執拗面亦得傳無窮

趙中令諒
與今原廟

脩食本不
同故云

題來青館

軒窻幽雅主人亦好事不俗遺
余二詩頗可喜故書此以遺之

客夢成時夜向闌幽泉挾雨響潺潺清魂便覺超塵世
何況真栖巖石間

泉州貢院舉梁八詠

萬間貢宇舊巍巍更闢新楹廣舊規豈為儒生次科計
要培宗社太平基

雲斤初還日逢甲虹影乍橫星值奎天相斯文兆先見
不須佳識指金雞

棘闈曾闢大江東喚起秦淮兩鰲龍況是此邦饒俊彥

何愁盛事不重重

江東清司舊無貢院丙子始創之於清溪秦淮之上方興後間有物蜿蜒

如蜥蜴隱見不常或曰此秦淮小龍也丁丑清開陳君頊為省元建康吳君潛為廷魁

明年丹詔下楓宸定有英材起海瀕勉取梁公舊衣鉢

從今人說兩庚辰

前庚辰梁文靖公題天下

梁脊伊誰姓氏題梅溪去後有苕溪自慙拙守何為者
強策騫駘繼駢

憶昔文闡創造初揮毫紀實有鴻樞乃今盛觀重輝赫

試問他邦有此無

貢院舊記梁文靖公在西府時作今曾公亦以掄魁位樞庭學中士友欲

援故事請

記故云

簪橐聯輝三大老節旄相映四賢侯作成後進須先進

引領時流作勝流

策足巍科亦漫然當知致遠識為先
丁寧莫負梅溪祝
名節岩莧共勉旃

泉州貢闈慶成

維南有州古佛國選佛場開自疇昔
誰歟經始梅溪翁
萬桂森森皆手植文風日盛賢才多
粉袍立鵠肩相摩
萬間底士豈不欲環視奈無餘地何
那知古壤在咫尺
鬼神撫呵天所惜一朝幻出青瑤宮
山靈獻卜龍避席

昔虞局促今恢舒乘黃騁足騰康衢闢新葺舊兩輝映
美哉輪奐雄規撫歲直金虬大魁出賸喜慶成逢此日
來春甲子又一周天相吾泉真可必輝聯四坐皆豪英
一樽敬為諸君傾浮雲富貴靡定態要看名節留芬馨
我今歸作漁樵侶清夢猶馳筍江潯鳳鳴側耳聽朝陽
把酒空山為起舞

壬午春社之明日請尊老會於西山之精舍龐眉
皓首奕奕相照真吾邦希濶之盛事輒成口號一

首併呈諸耆壽且堅異日早退之約云

耆年自是國之珍何間衣冠與隱淪華髮共成十一歲
清樽相對十三人休談洛社遺風舊且頌倦游慶事新
三徑未荒宜早退要將壽標伴莊椿

長沙贈高年陳氏母子

陳氏春秋一百一兒女年皆過七十一門慈孝更雍愉
四老真堪入畫圖長官申聞太守喜召至階庭加盛禮
老萊綵服作兒啼今視古人更過之老萊一身娛嬉耳

況有三兒奉甘旨人言潭俗不古如若看此事天下無
一門高壽何由得慈孝之人天所惜我願湘民胥傲之
從此九州皆壽域

長沙新第呈諸學士

莫清彼瀟江莫峻彼衡嶽澄光挾秀氣日夜相回薄月
吸珠含胎虹貫玉生璞子方有苗裔溫然粹而慤一童
與三何雙鳳兩鸞驚奮身辭艸萊正論吐謬謬彤庭拜
恩歸天香尚盈握良才國之寶一見我心樂平生功名

會萬里初著脚永肩致主念更勉經世學錙銖分義利
毫縷辨純駁相期激清風與俗洗氛濁誰歟指其南是
邦有先覺

和侍讀祕監餞行嚴韻

任參

帝里參陪意最親聯鑣忽此為交鄰徐行得接雙飛鳳
驟別難留一角麟歸奏已趨天尺五寵光仍待月重輪
應憐留滯窮邊客晏歲嚴霜夜夜申

未聯又云衆芳正
賴君培植莫忘辛

夷與
露申

送張曜之

遂昌張君曜之遊淮東謁予故人陳制參以小詩二
絕祖其行

風煙千里走淮湄寄語青油幕裏人麟閣功名須有意
乃心王室勿謀身

譚天之外更譚兵風角孤虛分外精玉帳不妨收拾取
絕勝下客著雞鳴

會長沙十二縣宰

從來守令與斯民都是同胞一樣親豈有脂膏供爾祿
不思痛癢切吾身此邦祇似唐時古我輩當如漢吏循
今夕湘濱一卮酒直煩散作十分春

長沙勸耕

是州皆有勸農文父老聽來似不聞只為空言難感動
須將實意寫殷勤

使君元起自鋤犁田野辛勤事總知要為爾民除十害
肯容苛政奪三時

已看三白兆年豐更喜春來雨澤通
從昔楚邦農事早
好將人力副天工

田裏工夫著得勤
翻鋤須熟糞須均
插秧更要當時節
趣取陽和三月春

聞說陂塘處處多
併工修築莫蹉跎
十分積取盈堤水
六月驕陽奈汝何

田家拚取一春忙
男力菑畬女課桑
隴上黃雲機上雪
暫時辛苦樂時長

鞠育當如父母恩兄弟更合識卑尊孝心盡處通天地
善行多時福子孫

千金難買是鄉鄰恩意相歡即至親年若少時宜欲老
家纔足後合憐貧

健訟翻成產禍胎帶刀却是殺身媒爭先好勝災偏速
退步饒人福自來

不教言語太艱深為要人人可諷吟把向田間歌幾遍
兒童也識使君心

別湯升伯

二十年前忝舊游，論交今日始從頭。
我如潦盡寒潭水，君似天空明月秋。
夜雨幾時重話舊，故山聞早共歸休。
臨岐贈別無他祝，莫忘鄒陳為國憂。

送林自知自幕中歸常寧

始吾與林子周旋，大江東子方清且貧。
簞瓢屢云空勁氣凜，不折耿耿如長虹。
明年擢高科，對策大明宮。
一尉遲五年，出入無奴僮。
再見湘水濱，凜凜復昔同。
招徠元

戎幕汎綠依芙蓉小生敢相吏故人儻相從云何歲未
竟失去如霜鴻挽之不可留聊復少從容老我慵且鈍
栽培欠深功子進未可量德業方崇崇永懷昔君子和
氣填心胃瀟溪霽月朗伊水春風融至今想其人猶為
起敬恭天資貴強矯學力無終窮我如石之頑遲子相
磨礪子質雖玉瑩可廢他山攻鴈峰毋久留來思靈麓
峰

司理弟之官岳陽相別於定王臺悽然有感為賦

五詩以餞其行

定王百尺臺長安萬里目昔人思親心山川詎能局於
馬共登臨使我增感觸微霜隕陔蘭悲風撼庭木銀山
在何許白雲但空谷搔首重徘徊冥冥江樹綠

念昔戲綵時歡娛共晨夕天風吹驚鴻一散不並翼相
逢重湖南感歎復悽惻王事不可留去指重湖北層樓
時悵望茫茫楚天碧數寄平安書老懷庶寬釋

憶我將漕年適如子今日於焉四閨餘過眼風雨疾壯

彊豈足恃進德當汲汲永懷古之人聞道在四十我慙
已過之因循悼前失子盍猛自鞭聖門本無柅

心源本澄靜皎月懸晴空利欲一汨之晶明變塵矇擾
擾千蜺虺攢攢萬銛鋒昏冥弗自覺乃與禽犢同一朝
發深省妙理仍昭融要須大敵勇鉤援臨崇墉不見簞
瓢人四勿收殊功

先民不可見懷哉金玉音士雖一命微愛物宜存心矧
茲園廩內白日變重陰求情筮楚下寃哉詎能禁諄嗶

漫弗省鬼神為悲吟子往蒞其職朝夕惟欽欽誰刑勿
留獄斯語真良箴

詩寄淮西王路分

壯哉貌虎三千士靜掃鯨鯢百萬餘若使人人似淮石
笑談真可靜千廬

兩宋名賢小集卷二百五十六

欽定四庫全書

兩宋名賢小集卷二百五十七

宋 陳思 編

元 陳世隆 補

西山先生詩集

二

真德秀

志道生日為詩勉之

我聞洙泗言惟仁靜而壽汝欲綿修齡斯義盍深究越

從開闢來新故更禪受巍巍獨山嶽屹立鎮宇宙其體
固而安其形博而虛噓呵雲霧興涵煦艸木茂皆由一
靜功變化生萬有千古無動搖兩儀等悠久吁嗟人心
危六鑿互攻鬪眇焉方寸微怵彼羣物誘擾擾無寧期
得不易衰朽汝今志於學一念貴操守天真後其源人
偽窒其竇治容命之斧妖聲性之寇腊毒由厚味亂德
本醇耐當如禦讐敵豈但惡惡臭斂然肅襟靈神物森
左右融融湛虛明後役息紛操還吾性之仁萬善此其

首但存達德三可卜與齡九不勝玉女心持用薦杯酒
題全氏三桂堂

唐人重科甲擬以折桂榮一登羣仙籍不美千佛經終
全歲寒姿乃比秋香清吐彼牛李輩伊優至公卿迄今
齒其入名字猶臊腥卓哉劉戶曹直氣霜稜稜一朝脫
淡墨千古揚芬馨雞峰有名家夾葉影儒纓庭中三嘉
樹屹立長嶂嶂西風正搖落翠葆黃金英勁節松可友
孤芳梅謂兄丁寧命誌郎我豈貪浮名愛此臭味同故

以書吾楹爾曹方懋學志取宮袍青要須勉植立母但
希騰凌已大外物小道充人爵輕當如燕山竇義方垂
世評勿效東堂詵射策矜虛聲懿哉君斯言可折末俗
醒刻詩堂之捐式觀全氏興

壽楊蘇父

迅雷地中藏當此沍寒日積陰排層空初陽露微茁而
曰天地心於此見機括良由勢方升猶木吐牙枿培壅
勿使傷怒長焉可遏此理之在人善端實初發熒熒火

將燃涓涓泉欲達吁嗟道心微物欲易攻奪差之一毫
芒相去舜與桀要須二者間明辨與精察見義勇必為
欲如矢之決去惡凜勿疑剖如刃之割坐令人偽消但
覺天機活四時無非春八荒皆在闔喜君生茲辰聊為
演此法願祝君壽長勿嫌吾詩拙

舞鶴亭歌

舞鶴亭空亭無鶴何為名亦如西山賦招鶴無鶴可招
也不惡何必玄裳縞袖二八真娉婷想像標致便足使

人毛骨清仙翁好鶴非徒爾鶴德從來比君子坡仙自
謂吾不如今翁與坡宜其殊蒼苔白石有餘樂一似簞
瓢甘澹泊笑殺飛鳶太不靈貪腥嗜腐譚然爭九臯一
喚醒人耳又如片言之善應千里更笑荒林老木終日
號畢逋說古說凶誰聽渠仙翁愛鶴愛其德我讀翁詩
三歎息便好從翁痛飲醉倒斯亭邊振袂起舞學胎仙

和趙章泉

天教一老立堂堂步武婆娑盡未妨元始故家典刑在

北方正學派流長新恩已煥青藜照舊德行詢黃髮良
多謝寄詩勤問訊自憐疎懶似嵇康

送永嘉陳有輝

永嘉陳君有輝潛心易學許以所著示余余未及請
而君歸矣拙詩贈行且堅再會之約云

深山讀易如康節白首談玄似子雲肯學時流誇末技
却於聖處策奇勲二圖君已窺微指十翼吾方媿淺聞
君聞水心葉公言十翼非孔子作嘗
質疑於某晚學不敢斷其是否故云
得意春風重過我

綠波清夜話義文

送吳定夫西歸

吾哀倦對客晤語惟青山修竹引清風時為掩柴關今
晨何人來踏破莓苔斑驚顧復自喜不妨伴虛閒
世情重聲利榮途足趨走夫君獨何為經年闔林藪東
尋金壇翁南訪玉峰叟借問兩臞仙來時輕健否

慈湖老仙伯乘雲賓帝鄉念之每沈瀾風味不可忘其
門多英特清文照鱗細為我最諸賢佐道當自強

君索
中有

趙元道表廣微錢子昆
陳和仲諸君之文故云

麻源在何許茫茫白雲端懷其一布裘何以禦風寒歸
來有餘師興盡當知還便好斲空谷賸種青琅玕

詠仁

程子精微談穀種謝公近似喻桃仁要須精別性情異
方識其言親未親

題隱者蘇翁事迹

蘇翁雲卿廣漢人隱東湖上魏公為相使帥漕挹其

來一夕遯去不知所之

魏公孤忠如孔明赤手能支天柱傾蘇公高節如子陵
寸膠解使黃河清等是世間少不得問津耦耕各其適
後人未可輕雌黃兩翁之心秋月白

卷中有詩譏魏公
不足與有為者故

云

題湖山清隱

西湖南山和靖廬西山東湖清隱居皇天從來具老眼
勝地不肯栖凡夫眼中四時風景曾次萬古皇王書

夫君豈是終隱者要學川雲時卷舒

新橋行

紹定戊子長至後九日南浦新橋舉梁其明日縣尹
宋侯之壽旦也輒賦新行以為侯壽

去年壽君時清溪無梁涉者危今年壽居時長虹卧波
指可期珍材遠林天發隱文石象玉神效奇蛟龜為橋
頃刻就又似仙伯工娛嬉官自憂民民自樂此事更屬
無窮思要須移此濟川手揀我王國無傾敝從今南浦

淶波上惠澤千春同渺瀰

題黃氏貧樂齋

漁洛相傳無別法孔顏樂處要精求
須憑實學工夫到莫作閒談想像休

道鄉曾舉龍門話認作元關透悟機
儒佛差殊真眇忽請君參取是耶非

閒吟

閒中意趣定何如靜把陳編自卷舒
希聖希賢真事業

潛天潛地細工夫林泉有分吾生足鐘鼎無心世味疎
政使一貧真到骨不妨陋巷樂顏癯

淨豁持鉢求度為說偈言

一真不昧人中佛五戒俱全俗裏僧必待方袍與圓頂
維摩龐老又何曾

淨豁讀罷白予曰如此則不須受度矣遂說偈
云青編讀後方為士黃牒頒時始是官不拜皇
朝真爵命要行所學也應難余謂解讀青編

便無黃牒亦得淨豁志在求度只得恁麼主張
併為書之以勸施者

贈小鐵面王相士

君以鐵面名自謂相人無軟語我亦鐵心人不把窮通
來問汝獨有一事欲叩君學海無底難窮尋幾時鐵拳
透鐵壁直窺千年賢聖心

贈岳相師

余方與友人劉定甫論西銘而岳相師來索詩遂直

書以贈

平生慣讀橫渠銘不讀許負天網書窮通歡戚若有二
天之玉女元非殊但應內省無所疚何必從君問休咎
北窗燕坐寂無言時聽幽禽吟晴晝

七峯行為外舅壽

有崇南岳之五峯倚天壁立雲濛鴻我嘗振衣峯頂立
頗似吾鄉好峯七七峯五峯小大雖不齊氣象肆兀實
似之牛首峩峩峙雙闕蕉嶺楊梅兩奇絕南臺林磔佛

世界百丈煙霞龍洞穴仙人冠劍端且凝仙源萬疊秋

空橫

仙源謂余婆山以仙遊山水之所自出故立今名以正此山之稱謂

紫青繚白望不

斷好似衡山山下青羣來秀孕兩宗工

謂文莊與文公也

文章

節操為世雄百年山川久寂歷人物今有仙游翁翁才

古干將翁目巖下電干牛解剝又有餘萬象妍媸鏡中

現可持龍虎節可運玉帳壽才高驚衆世弗售祇令遺

愛留丹丘丹丘遺愛人人誇經界寬祖惠最多后王嘉

之錫異夢使汝有子登巍科翁壽當萬千翁年纔八十

視昔殷大夫僅乃十之一渭川出處付何心獨探元關
深更深舞鶴山前春色好靜對七峯長不老

題李立父高遠樓

君家百尺樓近在環堵室室處豈不佳暑溽厭煩鬱著
脚躡層梯心眼使超軼好風天外來佳月雲端出清明
湛空濶洞視了纖悉豈徒快登臨抑可驗學術大哉天
地心昭然本如日世人庠且隘動以私見室未能脫塵
凡底處識微密羨君有斯樓發以靜春筆知崇與禮卑

二義貫於一燭理要高明履道貴平實庶幾足目俱不
但窺彷彿工夫妙方寸豈假身外物此境未昭融此屋
空突兀君看希聖徒陋巷暗蓬蒿

以青氍與志道

衝寒暫行役遺汝以青氍要識夜眠處當如親膝前

易曰

無有師保
如臨父母

清溫供子識清白保家傳小令多堪法母顏

字畫妍

戲之父子忠孝大節
多可法字其末兩

賀外舅轉官

黃山桃李開春風曾見先生化育中經界力行師孟子
井田有意復周公幾年凋俗成佳邑一旦新綸賞舊功
明主已知材智美渭川行起釣璜翁

壽楊龢父

壽日將何勸壽卮不妨拈出去年詩大生皆自微陽起
百善端從一念基身欲寧時須主靜幾纔動處要先知
老來自笑無新句那得仙翁一解頤

兩宋名賢小集卷二百五十七

欽定四庫全書

兩宋名賢小集卷二百五十八

宋 陳思 編

元 陳世隆 補

西山先生詩集 三

真德秀

壽外舅楊開國

大中大夫漢千戶子男一位周諸侯人生到此不易得

况復寶帶懸精鏐雖然三者皆外物達入脫視如雲浮
天公最青是眉壽七十從來已稀有堂堂玉立仙遊翁
歲比磻溪未華首碧瞳射人雙鏡懸曉窻貝葉聲琅然
問渠那得許强健陰功久在朱陵編願翁遨嬉更千歲
做盡人間方便事却乘白鶴御丹鸞直上紫清朝玉帝

贈盱江張平仲

希李

去聖既云遠至理日以冥言道指虛玄語性雜精靈正
傳久蕪沒異學得魁橫卓哉周程張磊砢三代英妙蘊

發天地微言昭日星後來紫陽翁抑又集大成煌煌八

書訓

謂論孟大學中庸太極西銘易詩也

凜凜萬世程學者生此時坦然

有規繩但患舍康莊自趨柴與荆張君江西來頗嘗得
師承敝衣雖懸鶉猛志欲掣鯨袖出文一編其辭峻而
清此士不易得歸歟更研精勿受俗學變而為寵辱驚
貧者士之常未合寧躬耕高門謹勿謁養此氣崢嶸不
見商歌入洋洋金石聲

送王子文宰昭武

樵川古樂國誰遣生榛菅往事忍復言念之軌長歎子
往字其人寄任良亦艱傷哉周餘民十室九孤鰥深心
察苛瘡摩手蘇痲癰願加百倍功勿作常時觀

熒熒匣中龍爛爛巖下電紛綸揮霍間坐子百千變雖
然事幾微易矚亦易眩誤從快處生理向靜中現健決
要安徐聰明貴韜斂潛齋有愚言或可代箴砭

百鍊或繞指粹白俄成緇有初諒非難其難在終之道
心眇絲粟易為羣物移不有精一功誰能勝惟危子今

如玉雪瑩潔亡少疵願言保令德歲晏以為期

堂堂先太史一節貫初終況有壽母賢切切惟教忠承
家諒匪易負任丘山崇可不日汲汲仰希前哲蹤敬義
兩夾持師友交磨礪餘事作詩人母顓鍤句工

平時州縣間上下意苦異善書肘或掣有志奚由遂子
今得所從展布有餘地兩賢更勗力萬物應吐氣相期
召杜功奕奕照采世不須峴首碑自有樵川誌

贈夏宗禹

夏君宗禹示余以陰符悟真講義嘉歎之餘為賦二絕

虎頭自合取侯封好為明時立雋功做了玉關班定遠却陪芝嶺夏黃公

丹經千卷浩如林妙訣無多底處尋但要靈臺常似水自然元海會生金

贈葉子仁

上饒葉子仁為人推算筭占往往如破的歲乙酉予

方在從班子仁以書來勸補外甚力未幾果去國進
退得喪豫定如此子仁之術亦奇矣哉茲來過予衡
茅為賦小詩三絕因以自釋云

易象推占妙入神勸人忠孝更諄諄只今誰似君平術

惟有南陽賣卜人

子仁每推論五行輒以善道勉人如孝弟忠信清心寡欲等語未嘗不懇

切言之故予以為有君平之風

花正紛紅俄駭綠月纔掛壁又沈鈞世間萬事都如此
莫遣雙眉浪自愁

知天馬用尤臧氏有命何須主瘠環若向此中能照破
許君已透利名關

贈徐碧鑑

人言得罪為狂疏若論疏狂罪不無亦既自呵還自笑
只緣骨相合崎嶇

論命豈能修造化相形那解脫頭顱知君藻鑑真超絕
試問窮通改得無

浦城勸糶

陽和二月春艸木皆生意那知田野間斯人極憔悴殷
勤問由來父老各長喟富室不憐貧千倉盡封閉只圖
價日高弗念民已弊去年值飢荒自分無噍類幸哉活
至今且復遇豐歲庶幾一餉樂養育謝天地豈期新春
來米穀更翔貴況又絕市無縱有濕且碎何由充飢腸
何由飽孥累恨不死荒年免復見憂畏我聞父老言痛
切貫心肺行行至平洲景象頓殊異白粲玉不如一升
纔十四問誰長者家作此利益事父老合掌言子文姓

陳氏起家本儒生疇昔樂賑施憶昨艱食時巨室爭謀
利米斗三百餘獨收七十二三都數千口受彼更生惠
開庫質敝衣假此賙貧匱取本不取息所活豈勝計我
曹非此翁久作溝中齒吁嗟薄倖中乃有此高義吾邦
賢使君愛民均幼穉一聞平糶家裒賞無不至或與旌
門閣補城沈氏或與錫金幣獨有潁川翁寵光未之被故作
行路謠庶微鈴齋遂且碑殖利徒聞風默知愧並生穹
壤間與我皆同氣富者盍憐貧有如兄恤弟惻隱仁之

端人人均有是頑然鐵石心何異患風痺不仁而多財

聚易散亦易惟有種德家福祿可長世不聞眉山蘇盛

美光傳記賣田救年荒生子為國器

即三蘇父子也近世三山黃長者家

喜賑施子模為己丑大魁

不見南浦毛一惟利是嗜積穀幸年荒生

子適黥隸天道極昭明勿作幽遠視誰歟為斯謠西山

真隱吏

挹仙亭

漢宮葦篴兒呱呱濟南梓柱陰扶疎富平家人正愉樂

欽定四庫全書

四庫全書
卷二百五十八

安昌帝師工獻諛子真東南一尉耳黃綬淒涼百僚底
手持短疏叩天閭義激丹衷淚橫背翩然一朝竟拂衣
愛君無路空依人傳九江已仙去吳門再見是邪非
神仙茫茫那可測上帝從來賞忠直天上果有驂鸞人
合顧羣真朝北極自從舉手謝世間千年白鶴何時還
玉簫聲斷杉檜冷祇餘丹竈留空山谷口之孫古闕使
亭斲青冥挹仙袂耿耿應懷貫日忠飄飄豈羨凌雲氣
我未快讀華星篇清徹毛骨風冷然何當結茅最高頂

一榻容我分雲煙

題黃君貧樂齋

飯疏飲水復何求
道在胸中百不憂
參取章泉克齋句
底須樓上更安樓

贈張童子

虎頭燕頤及鵞肩
自笑都無一事全
惟有數條爪樣骨

尚堪山澤作臞仙

如爪骨出
人倫書

聞君早號張童子
顧我初非韓退之
可惜浪拋洙泗業

只看風鑑學希夷

贈邵邦傑

邵邦傑妙絲桐之技又善寫神西山翁嘉之為賦絕句

五寸管能摹造化七絃琴解寫人心平生不作麒麟夢
且聽高山流水音

壽楊猷父

誕日娛親始是榮如君慶事世難并名園春滿三三徑

眉壽天開九九齡帝渥頻霑新誥紫

雙親即日
兩膺封誥

文階重

煥舊璫青玉杯從此年年把笑勸樽前兩福星

贈梓潼袁君西歸

君辭萬里蜀東游海之壖所挾大易數自謂探幽玄縱
橫布籌算妙若著之圖殷勤扣其說得數須得全人生
穹壤間其孰司陶甄短長辨鳬鶴百一分夔蚺造物初
何必賦受自爾偏數有饒與乏定命誰能遷理則無虧
盈一性各渾然顏跖偶壽夭堯桀非愚賢緬懷樂正子

聖門得真傳全生必全歸此語星日懸予生故多奇榮
枯聽諸天獨有仕道心未死須乾乾君提空囊至又復
垂索旋豐嘗卜而來所遇非昔泉術工用乃拙為子笑
且憐矢詩苦不多聊壓瞿塘船

會三山十二縣宰

皇皇造化鈞索籀生萬彙林林滿穹壤異體實同氣痛
癢本相關彼已當一視矧惟守令職休戚我焉寄盍推
若保心騰焉撫孩穉橫目事征求往往學頑痺牀剥膚

已侵鷹擊毛盡摯但期已豐腴遑恤彼憔悴近來二十
年貪風日滋熾蒲萄得涼州西園闕成市環瞻郡邑間
大半皆汚吏民窮盜乃起原野厭枯觜哀哉羅禍徒念
之輒揮涕天地忽開張清飈掃氛曠我乃於此時擁旄
忝為帥顧慙老儒生蹇拙乏長技同官為僚友努力圖
共濟惟閩古大都星羅邑十二豈無良大夫與我同厥
志要如羔羊直委蛇自無愧勿為碩鼠貪躑躅乃多畏
上方明黜陟我亦公舉刺民言即豐碑令聞疾郵置黃

堂一卮酒殷勤抒至意慎勿多酌余憂心正如醉

游鼓山

六月二日偕潛夫參謀諸友游鼓山餘湧泉亭明旦
登天風海濤坐白雲亭追懷昔游愴然有感偶成拙
詩奉呈并簡住山明師

嚴宸有追詔趣上太守符疲民未蘇醒還顧空躊躇來
尋靈源盟喜與佳客俱始酌清冷泉一浣丹墨滂超然
煩溽中著身在水壺遲明陟危亭雲濤渺空虛煙霏修

開闔峰巒時有無偉哉此絕觀雄壓東南隅蒼崖萬仞
立四面環瓊琚翠木巧蔽虧亭午清陰敷令人澹忘歸
似到真華胥憶昨汎蓮日選勝邀朋徒摩挲巖上刻慨
仰趙與朱舉觴酌且盟一節期終初重來三十年恍如
隔朝晡並游四五人存者獨清癯有懷子陳子感嘆為歎
獻子抱明月終我方長塗趨顛踣懼不免儼省當何如
願言祝同社著力相携扶禪伯亦可入新結峯頂廬老
我故倦游軒冕非所娛會須脫塵鞿來依嬾殘居

壽陳宰 貽

花種河陽未十旬和薰四境蚤如春
試看條教頻頻下字字無非育物仁

為民一念徹淵泉
蔬茹餘旬始籲天
歲事豐登鄰寇熄
乃知感應鼓桴然

贈吳景雲

昭武吳景雲善篆工刻為余作小印數枚奇妙可喜
因有感為賦二首

錕鍔切玉爛成泥妙手鑄銅亦似之若會此機來學道
石槃木鑽有通時

腰間爭佩印累累真印從來少得知不向聖傳中有省
黃金斗大亦何為

送曹晉伯令尹之官

須江壯哉縣誰遣莽成墟舊觀嗟難復罷民苦未紓手
摩應切切鞭算盡徐徐賴有賢邦伯當令子志攄

此邑吾鄰境嘗聞歎恨深有田盡增稅無楮可為衾願

布中和政母懷忿疾心歸田當有日好聽宓生琴

兩宋名賢小集卷二百五十八